

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 22 OKTOBER 2015

SOALAN :

Tuan Wong Ling Biu [Sarikei] minta MENTERI PERUSAHAAN PERLADANGAN DAN KOMODITI menyatakan apakah punca utama menyebabkan harga komoditi getah dan kelapa sawit menurun dengan begitu mendatar. Apakah langkah dan tindakan kerajaan pusat yang telah diambil untuk membantu pekebun atau peladang getah dan kelapa sawit.

JAWAPAN :

Tuan Yang Di-Pertua,

Untuk makluman Ahli Yang Berhormat, harga komoditi getah dan sawit seperti harga komoditi lain di pasaran antarabangsa bergantung kepada penawaran dan permintaan. Dalam hal ini, antara faktor yang menyebabkan harga komoditi getah dan kelapa sawit menurun ialah:

- i. Pertumbuhan ekonomi yang perlahan di negara-negara pengimport utama seperti China, Kesatuan Eropah dan Amerika Syarikat yang memberi kesan terhadap permintaan dan seterusnya harga;
- ii. Peningkatan stok ekoran pengeluaran melebihi permintaan. Sebagai contoh, negara-negara baru pengeluar getah asli seperti Vietnam, Cambodia dan Cote d'Ivoire telah menyumbang kepada stok berlebihan dalam pasaran antarabangsa;
- iii. Dalam kes sawit pula, peningkatan pengeluaran kacang soya dan minyak bijian yang merupakan pesaing utama, pada suku tahun ketiga 2014 telah melembabkan harga sawit; dan
- iv. Kejatuhan harga minyak petroleum mentah dunia yang rendah telah menjejaskan permintaan biobahan api berasaskan sawit.

Tuan Yang Di-Pertua,

Untuk makluman Ahli Yang Berhormat, Kerajaan amat prihatin terhadap sara hidup pengusaha tanaman getah dan sawit terutama pekebun kecil.

Bagi membantu pengusaha tanaman getah, di mana hampir 95 peratus daripadanya terdiri daripada pekebun kecil, langkah-langkah yang telahpun dilaksanakan oleh Kerajaan adalah seperti berikut:

- i. Menyediakan skim bantuan khas sebanyak RM500 seorang secara *one off* kepada pekebun kecil getah di seluruh negara pada tahun 2013 dan 2014; dan
- ii. Melaksanakan Insentif Pengeluaran Getah (IPG) mulai Januari 2015 yang merupakan satu insentif ke atas setiap kilogram getah yang dikeluarkan apabila purata bulanan harga SMR 20 FOB berada di bawah Paras Harga Pengaktifan (PHP).

Tuan Yang Di-Pertua,

Bagi memperkukuhkan harga sawit, langkah serta merta dan jangka masa panjang yang telah dilaksanakan termasuk:

- i. Meningkatkan penggunaan minyak sawit dalam negara melalui peningkatan adunan biobahan api sawit dengan diesel petroleum melalui Program B7 (adunan 7% biodiesel

sawit dan 93% diesel petroleum) mulai November 2014 dari Program B5. Program B7 akan menggunakan 575,000 tan minyak sawit setahun; dan

- ii. Skim Insentif Tanam Semula 2015 (SITS 2015) telah dilancarkan pada 1 Oktober 2015 dengan peruntukan dana dari Skim Penstabilan Harga sebanyak RM100 juta. Tujuannya adalah untuk mengurangkan pengeluaran hasil buah sawit supaya menyumbang kepada penurunan paras stok minyak sawit dan seterusnya membantu peningkatan harga minyak sawit di pasaran.

Selain langkah-langkah tersebut, Kementerian Perusahaan Perladangan dan Komoditi akan meneruskan langkah-langkah jangka masa panjang untuk memperkukuhkan harga kedua-dua komoditi tersebut. Ini termasuk:

- i. Memperkukuhkan pasaran eksport sedia ada serta menembusi pasaran-pasaran baru bagi produk-produk berasaskan sawit dan getah;
- ii. Meningkatkan aktiviti penyelidikan dan pembangunan (R&D) dalam penghasilan produk-produk baru untuk dikomersilkan oleh pihak industri;
- iii. Bekerjasama dengan Thailand dan Indonesia di bawah rangka *International Tripartite Council (ITRC)*, serta di bawah *Association of Natural Rubber Producing Countries (ANRPC)* yang melibatkan 11 negara pengeluar getah asli. Antara

aktiviti utama adalah pendekatan mengimbangkan penawaran dengan permintaan getah; dan

- iv. Bekerjasama dengan Indonesia dalam penubuhan *International Palm Oil Producing Countries Council* (IPOPC). Badan ini yang akan juga disertai oleh lain-lain negara pengeluar minyak sawit akan membolehkan perancangan dan pelaksanaan aktiviti-aktiviti untuk memperkukuhkan harga.

Tuan Yang Di-Pertua,

Kementerian Perusahaan Perladangan dan Komoditi akan terus melaksanakan langkah-langkah jangka pendek dan panjang ke arah memperkukuhkan harga komoditi getah dan sawit. Ini adalah untuk memastikan para pengusaha tanaman getah dan sawit terutamanya pekebun kecil meraih faedah daripada usaha mereka.

Sekian, terima kasih.